


A Monthly Christian Magazine

AN ORGAN OF THE ZOU PRESBYTERIAN CHURCH SYNOD

Khristian Tangkou

Vol. 56 || No. 4

April 2020



Editor: Rev. Khamchinkhai

Synod Kumpuon:

Thukhenna dih leh dihtatna khu tui bang in luong hen (Amos 5:24)

Khristian Tangkou

Vol. No. 56 || Issue No. 4 || April, 2020

A sung thu

Editorial Board

Editor : Rev. Khamchinkhai - 8730933744
Joint Editor : Rev. Dr. Hangpi Maunlun - 9862910875
Cir. Manager : Upa Jamsianmung - 9862086615
Bus. Manager : Upa Kamgenpau - 8974612937

Ms. Niangkhanmang
Miss Tracy Niangsuannuam

Cont. Editors : Upa Khupsuankham - 9856406454
Rev. Awnkhanhup - 9862828921
Rev. Thangboi Khuongsai - 8119957887
Rev. Khamminlian - 8414998542
Rev. P. Ginzalal - 8131814376
Upa Dr. M. Lachinkhai
Upa Jamgenthang
Upa M. Lianminthang

ZOU SYNOD ULIENTE

- **Moderator:**
Rev. Zamlianpau
- **Moderator Elect:**
Rev. Kapsuanthang
- **Secretary (Sr):**
Upa Kapkhanthang
- **Secretary (Jr):**
Upa M. Kamzadou
- **Treasurer:**
Upa M. Sianzahau
- **Statistician:**
Upa Shanti Kumar
- **Executive Secretaries:**
Rev. Khamchinkhai
Rev. Dr. Hangpi Manlun

- Editorial..... 01
- Thu tuomtuom & Thumpi ding 02
- Corona Virus 04
- Sisan Toh tatkhiehna thu 05
- Alai ah Jesu..... 09
- Emau Lampi! 11
- Thawkiana chi nite 15
- Shina zou a Thawkiana 19
- ZPWF Column 23
- Khochin Sawmakhat sun dan 24

Copies - 1200

AMAN

Kumkhat ah	- ₹	100.00
Post ah	- ₹	200.00
Copy khat ah	- ₹	10.00
Life Member Fee	- ₹	1,000.00
Patron Member Fee	- ₹	2,000.00
Memorial gift	- ₹	2,000.00

Thusuo zosie Editor leh Zou Synod ngaidan ahi kimsih a, a suotute'n maw a kipuoh chiet ding uhi.

Thusuo dingte Editor kung a pieh ding ahi.



Pasian hing mapuina toh March ha zou in April ah i lut ua, khovel buoina tamtahte lai ah bittah a hing kem a, Ama be thei leh Ama nna sem thei a hing koi Mangpa min phat in a tung ah kipah thu i gen uhi. Tualeh hun hoilou ahing tun in zong Mangpa Jesun “Ka hun ahing nai chiengin, gal thuthang hing um van, pul hing tung van” chia gente tangtunna ahi ban ah, “Noute a ding a mun bawl a pei ding ka hi, tuachin noute la ding in ka hing pei kia ding hi” a chi pen kinai hieihieita abang a, bangteng tung nanleh Mangpa muong in theitawp suon in sem va ui.

Tualeh i mai ah April ha sung in ei Khristiante a ding a hun poimaw mama Palm Sunday, Good Friday leh Easter Sunday” hing um ding ahina ah, eite a ding a A hinna hing pie i Mangpa Jesu pahtawi a um ban ah ei a ding a hing thuoh a, A hinna hing pie a eite thawkia theina ding a, hing thoukia, thawkiana makaipa Jesu Khrist gel doh kawm in lungsim ah chitahna toh mang chiet dingin kipann chiet va ui.

Sakhuo dangten tam leitung a damsung un a pasiente uh bie in leitung damsung nopsahna ding maimai ngaituo in shi ngam in a bie ua, eite Pasian pen ahileh tam damsung mai hilou in shi nua chieng a i umna ding hing bawlsah in Ama innsung mi hina “Ta” a hing pom a, a Van inn nuom a hing puitou dingpa ahizieh in kipah leh thanuom tah in A nna sem chiet va ui.

Thu tuomtuom leh Thumpi dingte



- 1. PWF Seminar 2020:** Pasion mapuina zal in Zou Synod nuoi a Numei Pawl kikhawkhawmna, Zou Presbyterian Women Fellowship in ana guonggalsa bangun March 13-15, 2020 sung in Presbyterian Church of India, Tuibuong ah Seminar 2020 um a, Seminar honna Rev. Stephen Chinzathang, Lentang District Bieltu Pastor in nei hi. Tualeh, Rev. Awnkhankhup, Rev. Hangpi Manlun, Synod Executive Secretary leh Nu Mankhanggai, ZPWF Chairperson-ten Seminar la in Seminar a tel zousie phattuompi in nuom sa mama uhi. Tualeh tam Seminar hun sung ah “Ka dam nite uh sim dan hing hil in, pilna lungtang ka nei theina ding un” (Late 90:12) chi thupi a zang in Rev. Khamchinkhai, Synod Sr. Executive Secretary, i/c ZPWF, Evant. Pauchin leh Nu Tingzavah, Finance Secretary, ZPWF ten Pasion thutah genna nei uhi. Tam Seminar vaiguon Pasianni sun hun ah Tunnu Limbel kum 10 chinna Pasion kung ah kipah thu genna leh Biehinn kai tawp in singpi dawnkhawmna kinei in Rev. Zamlianpau, Synod Moderator in Pasianni sun in Mangpa Nitah annsieng hawmna nei in lawchingtah in tam Seminar vaiguon kizou hi. Mangpan thupina tangta hen.
- 2. Khristian ni poimawte:** Tu April ha sung in Khristian ni poimawte - **Palm Sunday March 5, Good Friday March 10** leh **Easter Sunday March 12, 2020** hing tung ding ahina ah, Hattuom chin in Hagau man a lawhpi chiet ding in vaiguon siem a, eite a ding a hing kipie i Mangpa Jesu Khrist thei kawm a lawching tah a mang chiet ding in i kingen uhi.
- 3. Upa Camp:** Synod in kum chin a i nei uh bang leh Office Bearer Committee thuphasah bang in Upa Camp March 26, 2020 chieng a Upate thumkhawmna leh Kikupkhawmna um ding chi hinanleh tulai Corona Virus natna ziehin in Government in tam natna bei

theina ding leh kilawsawnlouna ding a mipi kipunkhawm ding a kham ziehin hunchiem umlou a suon ahi. Ahun ding pen a lemtan bang in theisahna hing kibawl kia ding hi.

4. **Sound Operating Workshop:** Synod Music Committee thuphasah bang in April 03, 2020 chieng in Sound Operating Workshop (Biehin a sound control dan training) nei ding chi hinanleh Corona Virus natna apat kivenna ding a Governor in thusuo abawl ziehin hun chiem umlou a suon a hi dan i kitheisah uhi. Ahun ding lemtang masapen ah hing kitheisah kia ding hi.
5. **Corona Virus toh kisai kitheisahna:** China gam apat natna hii leng Corona Virus (Covid-19) ziehin khovel pumpi a kiling a, gam tuomtuom in a mite uh kiveng ding leh tam natna a bei theina ding a pan la ding a thusuo a bawl ban uah, World Health Organisation in zong hiipi leng in ana puongta hi. Ei India gam tanpha ah zong mu ding a um tah banah shina tanpha tung ahiziehin India Government deina bang in mipite kiveng chiet ding leh tam natna a bei theina ding a pan lachiet ding in zong thusuo ana bawlta hi. Tam thusuo toh kisai in i kikhakhawmna uh PCI General Assembly in zong Hattuum mipiten tam thupoun zui a, eima damtheina leh midangte damtheina ding a pan la chiet ding in Press Release ahing bawl ban ua, Manipur Government in zong thusuo ahing bawlte Hattuum mipiten zong zui chiet ding in i kingen un i kitheisah uhi.

Thumkhawmna: Tam Corona Virus (Covid -19) in ma sawnlou a, abei sieng theina ding in Synod sung a Hattuum zousie in March 28, 2020 chieng a thumkhawmna local in nei chiet a, eima lemtan bang a Vaiguon siem chiet ding a zong nget leh theisah ihi uhi (Vide 5th OB R/No.3 dated 18/3/20)

Tam natna hileng apat kiven ding dan:

1. Mi khat apat midang tung a kilaw sawn thei natna ahizhein Biekhawmna chilou sil dang Vaiguon mi 50 tunglam kipunkhawmna, Khawmpi, Training, Programme, Retreat, Camp, Workshop, Crusade, Consultation chite bawllou phot ding ahi.
2. Ahithe i tan ah gam pulam a zinkhiet lou ding.
3. Mipi kipunkhawmna ding Vaiguon umte ahun suon ding.

4. Khut silsieng gige a, ahithe i tan a sienthoua lam uong bawl ding
5. Hattuum Vaiguon umte ah zong pilvang tah a kizah ding
6. Neh-le-dawn, sil-le-teen leh vanzahte siengthou tah a kep a zah ding.
7. Bangkim bawl thei Pasion kung ah a bei theina ding in thum chiet va ui.
8. **Shie Ginzahau Office Assistant Pension peita:** Zou Synod Pension Board Committee thuphasah umsa bang in apeisa February 28, 2020 (Friday) niin Shie Ginzahau Office Assistant atahsa kum kum 60 a chintah toh kiton in MGP Golden Jubilee Hall ah Pension pieh in umta maban ama leh a innsung mite khosahna ding uh Pasion hoina leh mapuina ngetpieh vaui. Mangpa'n mapui in umpi zingta hen chi ithumna uh ahi.
9. **Thumpi ding:** Pasion mapuina toh Siemsinnate pei tou in Pawl-X & XII Exam pei tou zel ah bang tan ahiei a zaw nua un, tulai natna ziehin zounailou a, khawl pawl a um a, tamnatna ahing bei a hindan ngaina i man kia ua, exam lawching tah a zaw ahi theina ding in thumpi chiet va ui.

.....

CORONA VIRUS (COVID-19)

Corona Virus (COVID-19): Khovel khantouna sang leh thupina kitu a khovel mihingte a buoi zing lai un China gamsung a khopi thupi mama khat Wahun khopi a kipat in natna kithei zoulou leh zauhuoi mama khat hing leeng in mihing tamtahten tamnatna a vei banuah tamtahten shilaw uhi. Tam natna min khu **Conora Virus (COVID-19)** chi ahia, kum 2019 tawp lam a mukhiet ahia, hinanleh ei gam ah 2020 February ha in a hing kitheikhe pan hi. Tu in leitung buppi tam natna dal ding dan leh suhdam ding dan ngaituo in a buoi mama ua, hinanleh tuni tan in a suhdamna ding damdawi kimu zou nailou hi. Ahing kipatna Wuhan khopi koima lut theilou ding leh koima pawtkhe theilou ding a khah chimit (Lock Down) ahia, nidang a khopi sung a mi tampi kiphu luoiluoite tu in kholai ah mi vahle mu ding a um nawnsih a, mipi a dim lampite a h koima mu ding umlou in a sip dideta hi. Tuachiin gam tuomtuomten patau dan a khet uh toh kituohin Khovel damtheina lam sai pawl (World Health Organisation)

in zong tam natna khu natna hipii in puong ua, gam zousie kikem siem chiet ding in thupuon bawl uhi.

Tam natna mihingte apat kilaw sawn bailam mama ahizieh in gam tamtahte gam dang toh kikawmna teng khahbit in a um a, Siemsinna innte leh Hotel-te kikhah in, mipi kipunkhawm ding kham ahia, Office a changkang tah a kizang Bio-Matric Attendance kizang ngam nawnlou hi. COVID-19 natna apat kiven theina ding in sienthouna poimaw a, khut singsieng gige ding leh maituomna (face mask) zang a, pilvangtah a kiveng chiet ding in Gamsung lamkaiten theisahna a bawl ban uah, India Government thupieh dungzui in Manipur

Governor in zong thusuo bawl in March 2020 ha sung pumpi Siemsinna innte khah ahiban ah mipi 30 tunglam kipawlkhawmna bawllou ding in theisahna bawl hi.

Tam natna damdawi ding khovel in a mu zoulou lai un i Mangpa kung ah damna kim um ahizieh in Jesu Khrist nuajui ei Khristian ten Mangpan Pasian min loup semna ding a tam natna a hing bei theina ding in thumna ah lan chiet va ui. Mangpa Jesun **“Noute a ding mun bawl a kuon ding ka hia, ka hing pei kia ding”** achipen hing nai hieihieita ahi dan thei in Mangpa kungah loupina pie in Mangpa deina bang hing tung zel ding in thum va ui.

SISAN TOH TAT KHIEHNA THU

(Good Friday Sermon).

“En un Pasian belamnou khawvel khelna pomangpa” (Johan 1:29)

Rev. Dr. Hangpi Manlun

1). Thupatna. Tatna (Atonement) chi umzie khu ‘katvei sep zou sieng china’ ahi. Mini kilemlou kilemsah ding leh pumkhat a siem china ahi. Tuaban ah, Tatkhiehna i chi chiengun silthum a um a: i). Vatatt khiehpen, ii). Atankhie pa leh iii) atatkhiehna pa chite ahi. Tuachin, atankhiepa in aman pie in, atatpa/nu khu ana suohta’in asuoh hina kipat in ang zalenta hi. Thamlouin, aneitu jong ang kikhehta a, mi tha in ang neita hi.

Tualeh, Greek ham ah tatkhiehna chi kammal chithum in akigen kia hi:

1.i). EXAGORAZO: Tam pen bazaar a sum metbawl na ding a zuoh son ding a lei a man pieh china ahi 1.ii). **AGORAZO:** Tampen, bazaar pan a van lei bang a lei; akilei zou chieng a aleipa sila/suoh a annasem china dan ahi. 1.iii). **LUTROO:** Tampen ahikia leh phelkhia, suohtasah china ahi. Atankhiepa in sum apieh jieha hing suohta ahita hi. Ahin, atankhiepa in force nna semsah somlouin, atakhieh mipa/ minu pen in asepnop leh sepnop lou ama sie-le-pha theina tung ah akinga china hi.

2). Tuaban ah ‘tan’ ichi uh umdan ahileh :

2.i) mi khat in abawng (Cow) khat mi lou ah/ huon sung alut ta leh atatkchiehna thu ahi. Aman ahuan neipa lungkimna bang in sum in avatan hi. Tuazou cheingin bongpen apuo a ang suoh kiate ahita a, tuachin lou neipan thuneina anei non sih hi. 2.ii). Tualeh, Hebraiten ata uh pieng masa penpente uh Pasian a angai jieuh un ana pekhie uhi. Tualeh ,adei uh leh sum bangza ahiai khat toh anua lei kia jeljel uhi. 2.iii) Tualeh mi a genthei jieuh a mi suoh leh sal a um khu a innkuonpiten/akinaipiten avatat dohna thu uh jong ahi. 2.iv). Tualeh, Hebraite ading in Aigupta leh Babylon apat tatna khu **TATNA LAHLAH** a **THUPIPENTE** ahi uhi. 2.v)

Tuaban ah, Greekten jong suoh khu ama-le-ama kitankhie thei bang in agen uhi. Suohin sum akhol a, tuachin Temple ah Siempu in apu kung ah asumte apie a, tuachin suoh khu ang suohtata hi. Tamte thei kom in hundamna khu “Tatna” chiin jong akigen hi.

3). Ei mihingte tat ikulna jiehte uh:

3.1). Suol/khelna in khawvel pumpi asuhsiet jieuh in: i) I Lenge 8:4-6, ‘Koima silbawl khiellou a um sih hi. ii) Sam 14:3 ‘Koima silhoi bol himhim a um sih hi. 3.2). Suol in Pasian toh ang kikhensahta jieuh in. Pasianin suol ahua a, amunuom sih hi. Hebrute 1.3). Tualeh Suol khun Pasian toh ang khenta hi. ISai 59:2 “ I suolnate un eileh Pasian ang kikhensah hi” (Mak 3:39; Ephesa 2:1-4; Sam 58:3). 3.3). Mihingte ama-le ama in akihundamthei sih hi.

4). Khrist tatkhiehna in tamte lah akipat in ang hundam hi.

4. i) Dan hamsie lah akipat in (Galatia 3:13). 4.ii) Dan viahomna nuoi apat in (Romte 6:14; Galatia 4:5). 4.iii). Suol silbawltheina leh akipat in (Tita 2:14 leh Romte 6:4) iv). Setan silbawltheina lah akipat in (I Kor. 2:14). 4.v). Khrist in amite khu amanpie in ang tat khie hi. (I Kor. 6:20).

Tualeh, Thuhun lui a tatna vanzah khu “Belamnou” ahi tangpi hi. Adam leh Evi-ten khelna/suol ang bawl cheing un guohtang in ang um ua, azumhuaina uh khuna/tuomna ding in theipite akhui uhi. Ahin tamten atuom theisih ua jong Pasian in jong apomsah sih hi. Tuachin, Pasian in belamnou ni athat a, avunte uh toh atuomta hi. Amauhte suolna jieh in suolna neilou belamni ashita hi. Ajiehpén Baibulin, “Sisan suolouin suol ngaidamna aum sih ding” achi jieh in ahi. (Henbrute 9:22).

Thamlouin, Thuhunlui a silpieh pemasapente tung ah jong akilang chieng mama hi. Kaina in alou a haichi piengte Pasian apie a, ahin Pasian in apomsah sih hi. A jieh ahileh sisan apanlou jieh ahi akichi hi. Tualeh, Abelin agata thau leh hoi pente apieh jieh in pomsah in aum hi. Bangjeh adieile? Kaina sang a Bel agamatat hoijoh jieh ahisih a, ajieh pen ani un mi khiel/suol tuohtuoh ahi uhi. Pasian in Abel apomjeh ahileh aman belamnou sisan alat jieh ahi. Tuakhu belamnou Jesu etsahna ahiban ah sisan atel jieh ahi. Ginna in Abel in Pasian tapa hing peiding lim-le-mel an aching masa chi jong imuei uhi.\

Tuaban ah, tamna silpieh nite’n a etsah khu lampi khat beh

aum Pasian toh kinaina ding in china jong aensah hi. “Hinna nei jousie hinna khu sisan ah aum hi” Tuajiehin, “sisan zousie khu mipite tawnkhelna lah mangna ding in maitam tung a buoh ahiding hi, chiin Mangpan thu apie hi” (Levitikas 17:11).

Tuaban ah, Isral-te Aigupta Pharo nuai a kum 400-val vingveng suoh a umlai un, suohtatna ding in belam sisan jieh ahikia hi. Tuachin Pharo in Israelte apotsah utlou jieh in Pasian in Gotna chi (10)-atungsah hi. Atopna khu tapa upapen leh ganda upapen shina tungton in agot hi. Tuana, suohtatna ding in Pasian in lampi khat abawlsah a, tuakhu Innkuon chinten belamnou gensiet bei khu atha chiet ding uh ahi. Tualeh abelam tha ding uh ahileh ahoibukim, dembei, mel hemlou, leh ateh jong ahilou ding ahi. Tuachin, nili akoi ding ua, tuajou chieng in athatpan ding uhi. Tuachin, belam sisan khu akotkhah mai/bieng uah atat dingua, tuachin sisan kitatna inn zousiete khu Angel in apeikan jeljel ding hi. Tammi thuin eiten Khross a Jesu sisan tungton a damna itanding dan uh ana ensah/malepta uhi. Tuachin, tam belamnou sisan in shina apatin a HUNDAMTA uh hi. “Sisan ka mu chiengin kang peikan ding hi” achi hi. (Exodus 12:13). Tualeh, sisan kitatlouna inn sung jousie

atapa upapen in shina atuohtha uhi. Ahin belamnou sian kitatna inn zousieten suohtatna atang uhi.

Tuabang in, eite belamnou Jesu jong kum 30-vel ahilaitah in ang shi ta hi. Ajieh ahileh, Pasian belamnou eite khelna tang a shipa ahijiehin ahi. Eite khelna ding in Jesu Moria/Kalvari tang ah asisan manpha toh ang tanta hi. Tuami sisan gingtaten/nuai aumten hinna anei jel uhi. Judaten, belamnou tahsa aneh bang un, eiten zong Jesu sisan leh tahsa ama ithei gigena ding in ila un ine un idon uhi.

5). Mangpa Jesu mihinate i en ding uhi.

5.1). Amakhu khelna/suolna neilou ahi. Pasian toh kibang aum ahi a, nang-le-kei khelna tang a shi a hi. Mipil khat in khovel a mithupi 10 tanchin agel a, Jesu khatna in apangsah hi. Tuajiehin, Jesu khu mithupi ahi.

5.2). Sila (Suoh) bangin ang um hi. Apiendan, ah gan inn ah ang pieng a, shina tan dong ang thuoh hi. Khelman shina khu aman anapieh jiehin eite suhdam in ium uhi. Laigeltu khatin, Jesu tanchin tambangin agen hi. “Jesun, piengsuolte, mitawte, kengbaite leh mishite nasan akaithou hi. Aman laibu khat jong a gel sih a, ahin tangthu khu gam teng ah gel in aum hi. Tuaban ah, ni chinin anuajui ding mi akibe

jungjung hi. A khelna/suolna akimu sih a, ahin mi khielte/suolte lawmpa jong ang hita hi” a chi a, adih mama hi.

5.3). Ashina ahuaisie mama hi. Mawneilou hinan leh mi khielte/suolte bang in ashita hi. I thuoh tang in nasa tahin athuoh a, Pa aw ahitheh leh tamnou toh hing kipelsah in chin athum hi. A zieh ahileh, adon ding nou ah khun khawvel pumpi khelna sisan a um a, Jesun adon siengta hi. Thamlouin, eite khelna jiehin Rome solkar court mai ah ading a, tuachin vuoh-le-satte, chilphit in aum hi. Ama kisatna sie lingnei ngakuai bang a ahien, asat chieng un, atel, avoute a kai khie ua, anat semna ding in, chi tuite abuoh nalai uhi.

Tuaban ah, linglu khu aphan ua, alu akhumlutna ding in phohbul in akhenlut uhi. Achilte uh phitin chiemmuina in anei ua, akivuoh huon ua, enghouin anuisat ua, tamte nang-le-kei jiehin ahi hi. Atahsa akeng apat alutan mongmong damna himhim aneishih hi. Stemunin “Jesu tahsa tulai bang a lim a etthei ding hileh etngam ding ahisih ding a, hingdia kilomlou kei kahintheina ding in, shidia kilomlou Jesu ang shita hi” achi hi. Tuaziehin, unau i Mangpa sisan khu a thawn a lungsahlou ding in ama gingta ding in Pasian min i kingen hi.

ALAI AH JESU

-Rev Awnkhankhup

Tuanah Jesu Kros tung ah a kilbeh ua, mi dang zong a gei tuoh ah a kilbeh ua, a lai ah Jesu a kilbeh uhi. (John 19:18).

Mangpa Jesu kilbeh a a um thu leh a kilbeh dan uh zong akibang tangpi a, themkhat khat a tuomna deudeu zong a um sam hi. Abih tah in Khantanhoi Johan gel khu themnou khat a tuom deu hi. Jesu toh mi dang ni kilbeh a um thu Mark leh Luk in zong a gen tuoh ua, Mark in **‘Suomhatmi ni’** a chi a, Luk in **‘Migilou dang ni’** a chi hi. Johan in ahileh **‘midang ni’** achi mai mai hi. Mark leh Luk ten **‘Khat a ziet lam ah, khat a vei lam ahi’** a chi lai un, Johan in **‘midang ni zong a gei tuoh ah’** a chi zou nua in, **‘a lai ah Jesu’** chi in a gen belap sese hi. Tua laitah khu tuni i thupi ding a i tel khieh uh ahing hita hi.

Johan in midang kilbeh a um samte umna mun a gen khu deikhop lou in, Jesu umna mun a genchien sese a, a hoi mama hi. **“Alai ah Jesu”** achi sese zieh in sil tampi khat a hing ngaituosah thei hi. Jesu pang langkhat tuohtuoh a midang nite kilbeh ahi thute leh a zietlam ah khat, avei lam ah khat a kilbeh khawm thute uh a gen khu Johan in deikhop lou in, Jesu umna mun genchien in, **“Alai a Jesu”** a um thu ana gen hi.

Mangpa Jesu a lai a a um thu toh kisai gen ding tampi a um tham ding hi. Pasian leh mihing kikal ah, a lai a Jesu a hing um zieh a Pasian leh mihing kilemna khantanhoi i thei un i tangta

uhi. I Bible ah zong Jesun a lai a tangzouta hi. Thuhun lui zousia in Jesu hing pien ding thu leh a nasep ding thute ngiim in thu ana gen chiet uhi. Tua Mangpa Jesu thu mama khu Thuhun tha in a nua sui kia a, tuachin thuhun lui leh Thuhun tha kikal ah, a laiah Jesu a ding ahi i chi thei ding uhi.

Alai a Jesu a dinna ah kilemna a um a, hundamna a hing tung zel hi. Alai a Jesu a um chieng in silzousie hing kigawmkhawm in, kipum khatna leh kithutuohna a hing um thei zel hi. Ei gingtute hinkhuo a Jesun mun laizang pen a tan zing a poimaw thu tambang in i sui ding uhi:

1. I thugenna ah a lai ah Jesu:

Sawltah Paul in Korinth mite kung ah, “*Aziehpen ken noute lah ah Jesu Khrist leh killup a umpa Ama loungal bangma dang thei ka tum sih hi*”, ana chi hi (1 Kor. 2:2). Khristian-te i thugin ah Mang Jesu khu a laigil pen ahi zing ngeingei ding ahi. Mi tamtahten eima tuina leh thudangte ki-uong gen thei sengseng in, Jesu Khrist thu leh a nasepte gen khalou zel i tamta uhi. Khovel sietna huoisie leh gingtute hatlounate bang uong gen nuom kisa in, a damsah pa Jesu gen khalou in zong ki-um thei zel hi. Tua sang a khawh zawlai khu midangte demna leh ei mimal kigen hoinate a pulpit i zah khah zel uh khu ahi. Paul ma bang in, i thugen laigil khu Jesu Khrist ahi zing ngeingei ding ahi.

2. I vaihawmna ah a lai ah Jesu:

Gam leh nam hi in, hattuom vaihawmna hitaleh Jesu Khrist alai a, ahing din chieng in lemna leh muonna a hing um thei zel hi. Hattuom leh pawlpite a Jesu sang a mimal in mun laizang a luo hun chieng in pawlpi sung noplou hing kipan pai

zel in, buoina in a hing zui pai zel hi. Mangpa Jesu i khuo leh vengte kipumkhatna ding in a itna in a sisan ahing luong khesahta a, chi leh nam kidaidanna baang satchim ding in a tahsa a hing lankheta hi. Tuaziehin, i nam kivaihawmna leh i gam solkal ki-etkolna ah zong, Pasian thudih bang tah in vaihawm vai in, Jesu alai ah ding sah zel va ui.

3. Innkuon sungah a lai ah Jesu:

Tulai in i tenna khovel ah innten khosahna a masawn ding leh ta leh naute maban ding khuolna in i pum buoi siengta uhi. Amabou, mihing pan lah hat a nei theilou Khristian innkuon nuom khu Jesu Khrist zieh maimai a nei thei ahidan i thei tha kia ding uhi. I nupa kal ah bang, teeh leh mou kal banah uleh naute kal ah Jesu ding sah zelzel va ui. Alai a Jesu a dinna innsung ah kingainiemna hinkhuo leh kideisahtuona in bul a pan a, tuachin sil hoi kisespah tuo utna in zui in, Jesu zieh a tan bangbang a lungkim theina a hing neisah a, limna leh kipahna hinkhuo nei in a hing umсах zel hi.

Thuzawna: Pasion in a tapa Jesu khu lei mihingte tankhe ding a ahing pien lai in, gentheithah in gan annkuong ah a hing lumsah a, tuachi ma bangin a shina in zong migilou nite kal ah khovel damna ding a banzah in a shisah hi. Tami thu ngaituo in, i gam a Pasion mizah manpha. Rev. H. P. Runremthang in, *“innsung chin leh hattuum sung a lemna*

thu theina dingin khovel a mi khielte damna ding a migiloute kikal a banzah pa Jesu in aban hing zah kia hen” chi in la ana phuo a, a dih in zong a hoi mama mai hi. Tuni hun in zong, i innsung, i hattuum leh i nam sung in a lai a ding diing in Jesu i poimaw chi i thei uhi. **“Alai ah Jesu hing ding kia in”** chi in i han zel ding uhi.

EMAU LAMPI! PASIAN TOH ZAWHKHAWM

(Mk. 16:12-13; Lk. 24:13-35 & Mak. 16:15-18)

Lai Siengthou ah Pasion toh zawhkhawm tamtah umte lah ah Palm Sunday, Good Friday leh Easter Sunday zang zou ihi toh kituoh in Emmau khuo zuon a pei mi nite Mangpa Jesu toh a zawhkhawm thu uh i houlim ding uhi.

Ei Presbyterian Church of India, thugin khu Pasion a mi thum, Pa leh Tapa leh Hagau Siengthou (Trinity) ahia, amauteng khu mi thum hinapi in mi khat ahi veve ua, tam khu sakhuo dang zuiten a theisiem theilou uh ahia, Pasion a hinna nei Jesu Khrist gingtute bou in i theisiem thei ahi uhi.

Pasion khu Thuhun lui lai in Pa Pasion in a kithei a, Thuhun tha hing kipat AD bul lam in Tapa a hing kilang in i Mangpa Jesu shi zou in Hagau Siengthou a hing kilang in ahing umpi zing hi. Thuhun lui lai in Tapa leh Hagau Siengthou thu Pasion in Jawlneite zang in gen nanleh ana theisiem theisih ua, atah a mu thei zong ahi naisih hi. Thuhun lui hing bei in Jawlneite genlawh bang in ahing tangtung tou a, Jesu Khrist hing pieng in ahing shi a, tuachiin thou kia in van a lahtou in a um a, tua zou in Ahing thuchiem dungzui in Hagau Siengthou ahing sawl hi. Tuachiin, eite khelna a shisate hing tankhie

in kumtawn hundamna ahing pie a, Pasian a mi thumte khu Thuhun tha ah hing kilang in ahing bukimta hi. Tu in i thupi uh i genta ding uhi.

1. Emmau khuo:

Emmau khuo khu Jerusalem khopi apat mallam a um mel 20 vel a gamla ahia, Jerusalem leh Jaffa khuo kikal a um ahi hi.

Emmau chi umzie khu Greek ham ahia, 'lungtang a deina tah nei' china ahia, tualeh, tuilum pawtna tuisam china zong ahia, tam mun ah tuisam khat a um a, tua khu tahsa damlouten damna a ngana mun uh ana hi leng hi.

Tuazieh in tam tuisam mun khu mi tamtahte kinepna leh damna mun ahi. Tam bang in nuajui mi niten zong tam Emmau khuo ah hagau damsiengna ana mu uhi.

2. Emmau khuo zuon mi nite:

I Mangpa Jesu Khrist khantan hoi gieltu Dr. Luk in, tam thu kintah in ahing na gelsah a, tam Emmau khuo zuon a peite khu Kleopa leh a lawipa ahi uhi. Amaute khu amin uh nuajui dangte bang in Jesu nuajuite lah ah simkhah hisih nan uleh Jesu gingta a, anua zuitute ahi uhi.

Jesu han apat a thawkia zou in a nuajuite kung ah a kihil a, a gensa ma bang a thou kia ahi dan chientah in ahil hi. Tam Jesu thaw kia ni mama a nitah lam a Jerusalem leh Emmau khuo kikaal a sil tung ahia, Jerusalem apat Emmau khuo zuon in Kleopa leh a lawipan lungkham meltah leh daa mel tah in lam a zawt ua, Jesun amau toh zawhkhawm ding in ava nai a "Na pei kawm ua bang thu houlim a, tambang a daamel puo na hi uoi?" chiin adong hi. Tam khuolzín mi niten Jesu ahilam theilou in Jesu Kross a kilbeh ahi thu leh aluong kiphumna mun ah a um nawnlou thu gen in Kleopa in, "Tulai a sil umdan theilou i? Jerusalem ah nang maimai mikhuol na hieimah?" achi hi. Jesun amaute kung ah "Bang sil umdan la?" chiin theilou bang in a dong kia a, Kleopa leh a lawipan Jesu shi dante, Jesu hina leh silbawlthei dante, Siempuliente leh Vaihawmtén shi ding a, a mawpai thu uh leh Kross a kilbeh ahi dan, ashi dan thute gen in a thou kia a, nuajuite kung ah zong a kihil chiin a gen ua, a thawkia dan gen nan uleh a lungtang sung uah theichienna tahtah a um

lou zieh in a da mama mai ua, a lungsim uh hawm in a thawmhau mama mai uhi.

A lungkham seng zieh un Jesun a damlai a, a thugente zong za napi in a manghil ua, thei zoulou in a um uhi. Lungkham leh danate in i mit mielsah in i lungtang a zingsah leng hi.

Tuahun lai in Jesun Ama tungtang thu Mosi leh guolneiten ana genlawhte uh; Khrist in a thuoh ding a, shi ding mawng ahidante leh kaithaw a um a, thupina atan ding thute hilchien in Lai Siengthou sung a kigenlawhte thu a hilchien chieng in a sung uah mei bang in a kuong a, hinanleh a theisiem nai sih uhi.

Jesu toh zawhkhawm ahi vang un bangma a theisih ua, ahin, a lungkhamnate uh kiem in nuom asa mama ua, Jesu toh zawh a Pasian thute a kikap lai un a lungkhamnate uh a manghil uhi. Tambang a houlim kawm a, ahing pei uleh a theilou kaal un a zotna mun uh Emmau khuo ahing tungta uhi. Jesu khu gamlapi a peisuoh ding bang in a kigen a, amauten Jesu ahi theisih nan uleh a ngaina mama ua, akung ua um a

taam phot ding in a hou/chiel uhi. Tuachiin, “Ni lah tum ding hita, khuo hing miel ding ahita a, kou toh taam in giehkhawm vai” chiin ahou uhi. Tambang a Jesu ahou chieng un Jesu zong amau toh giehkhawm ding in a lotta hi. A giehna ding uh Emmau khuo ah nitah ann nekhawm ding in atouta uhi. I Mangpa Jesun tanghou ala a, phalsuo in a guolzawl a, tuachia tanghou aneh lai un amit uh hing vaah in Jesu ahi lam ahing thei ua, hinanleh tam hun laitah in Jesu khu amaute mitmu apat a mangta hi. Amau tegel kihou in “Lampi a ahing houpi a, Lai Siengthou thute ahing hil lai in i sung ah meikuong abang hilou i?” chiin a kihou ua, tuachiin a giehna ding uh Emmau khuo ah zong gieh talou in Jerusalem lam ah kile kia in nuajuite kung ah a sil tuohte uh gen in “I Mangpa a thoukia tahtah ahi. Simon kung ah zong a kilah ta hi” achi uhi.

3. Eite kung ah:

Tam Emmau khuo zuon a pei mi nite leh nuajuite bang in eite zong i kineppi mama i lamkaipen pa khat hing kimatpieh in hing kitha piehle bangding in zau leh

thawmhau in umlou ding idiei? I Mangpa Jesu ngel zong Kross a, a shi ding kuon in a thawmhau a, “Pa aw, bang ding a nei taisan ahiei?” chiin a kikou hi.

Tuniin mi tamtahten i lungkham, i mangbat niin I Mangpa Jesu hing chielna theilou in Zu-le-sa in a kihenem ua, tep-le-muom, khamthei-guithei leh kimawlina hoilou tahtahte toh a kihenem uhi. I hagau dangtah mama damna ding in hagau tui dawnlou in tahsa tui i dawn uhi. Ita-le-naute Jesu toh a zawh lou zieh un a hagau dangtahna uh theilou in tahsa lam dangtah bang a kithei in khamthei-guithei sal ah a taang uhi.

Emau khuo zuon mi nite bang in tuni tan in i Mangpa Jesu khu eite toh zawhkhawm ut in ahing chiel zing a, i lungkhamna-danate hing henem nuom in “Bang thu atai na buoipi” ahing chi hi. I Mangpan i buoinate hing suhveng pieh ut in ahing dong zing a, eite a ding a hing shi in thou kia nanleh eiten ama chielna i nahsah lou uleh ama thu in ahing kilai tahla theisih hi.

Jesu Khrist zieh in Ama

phatna lasah nuom isa un, phatna Lapawlte bang i ngai nuom mama maithei uhi. Hinanleh ama i saanlou zieh un eima tang a i um chieng uleh solna i tuoh chieng un i dou zou sih uhi. Tuazieh in Biehinn sung i tun chieng un ahing a vangam kai thei ding khop in ihoi ua, hinanleh kholai ah Jesu toh i zawhkhawm lou zieh un gitlouna lungsim toh i pumdim uhi. Emmau khuo zuon a pei Kleopa leh a lawipa bang in i kung ua Jesun ahing nai zing lai in ama chielna pom in zawhkhawm in taamkhawm in, annekhawm lei i hagau mit ahing suhvahsah ding a, heisung mun ah zong ama deilam bawl in i lungnuom thei tading uhi.

I Lungkham mangbat ni, i thawmhau ni chieng un Jesu thugente ngaituo zel henlen hilei i lung a hing kihong ding a hamuonna i nei thei ding uhi.

Lawmta niten, Jesu hina a theichien tah chieng un mawh um thei talou in, Emau khuo a gieh ding a kisa hinan uleh gieh talou in azanzan in Jesursalem manaw in apei ua, nuajui dange kung ah a thu thei uleh a mute uh a gen

pai uhi.

- Eite zong Jesu Khrist a kitheichienna/pienthana inei mai uah a hunsih a, Mangpan athu puongzah ding in ahing dei hi.

* Mak 16:15-18 ah “Tuachiin akung uah, Vanney buppi ah pei unlen michin kung ah Khantan Hoi thu va ge ta un. Tuachiin koi zong a gingta a, baptisma tang tapou hutdam in um va un, hinanleh a gingtalou pouma khu siemmaw tansah in um tava. Tuachiin ginna nei zousie sillamdam bawltheina tha kipe van: ka min in dawi deldoh va un; gul aman un zong gu a dawn kha un zong sukhah in um sih va uh. Tuachiin chinate tung ah khut ngam va un, tuachiin damsah ta va uh” achi bang

in i thei thute genkhe ding leh shi tanpha a theipitute hiding in Mangpan ahing dei hi.

@ Hamsatna chinteng a kipat in hing tankhe lou ding hinanlezong Mang dang chibai buh thei kahi nawnsih.

Mangpan zawhkhawm ding in ahing chiel zing a, Thuhun lui ah Mosi leh Jawlneite Pasian toh a zawhkhawm ua, i Mangpa Jesu lei a ahing len lai in anuajuite ama toh zawhkhawm ahi bang un tu Hagau Siengthou hun ah Hagau Siengthou toh zawhkhawm henlen hilei i damsung nite ama dei dan bang a gamta in i Gam sung, i Nam sung, i Hattuum, i Innsung leh i mimal hinkhuo a dam ding a, nuomsatah in tam leitung ah i khosa thei ding uhi.



Easter Sunday Sermon

Thawkiana chi nite

Bible tang teel: Johan 11:43-44; Johan 20:1-7

Rev. Kamminthang, Chennai

Thumapui: Pasian mapuina toh kum 2020 mel hing musah a, thawmging hoilou tampite kawmkal a gingtute dia i ni poimaw uh Palm Sunday, Good Friday leh Easter Sunday hate bang mu leh zang thei kia dinga i um zieh un i bieh Pasian in thupina tangta hen.

Tamna a tunga i Laisiengthou tang teel tegel apat in thawkiana chi nite thupi a zang in Pasian thu houlim lei ka nuom hi. Tualeh simtu zousie nang leh kei bang pen ah i thoukia ei chi ana kingaituo dingin Pasian min in ka hing chiel masa hi.

Khovel/leitung ah hattuum chi tuomtuom tampi a um a etsahna'n: Hindu, Islam, Buddhist, Sikh leh a dangdangte a um hi. Tamna hattuum mukhie (founder) a um chiet ua, hinanleh koima hattuum mukhetute i Mangpa Jesu Khrist bang a thoukia a um sih uhi. Ama bou ei Khristian-te apen Laisiengthou gen ma bangin ni thum ni in shina apat in ahing thoukia hi. Tami ahi Khristian-te ginna ahoi leh a muon-umna. Sakhuo dangte toh i kibahlouna uh, shina apat ahing thawkiana ahia, hing thou kia sihleh nang leh kei ginna pen shi ahiding hi. Hinanleh shina apat ahing thawkia zieh in i ginna uh a dih a, ahing a, abukim ahi.

Laisiengthou Khantanhoi Johan 11:43-44 leh 20:1-7 ah i etleh Lazar leh i Mangpa Jesu thawkiana thu Johan in amu dan leh athei dan in ana gel hi. Tamna atung a shina apat a thoukia tegel apat gingtute'n zong zil ding um ahiman in Pasian thu a i kikum

ding uhi.

Bethany khuo a um Lazar kichipa a shina ni lii aphah zou in, Jerusalem akipat in i Mangpa Jesu tuomi khuo zuon a ang pei laitah in a sanggam nu Martha in Lazar shi dan leh ani phaza chiengtah in ana hil siang hi. Hinanleh Jesu'n a gei a ding mipite Pasian in ahing sawl chi a theisah nuom zieh in ni lii han a um Lazar a kaithouta hi. Tuachin Lazar akituomna puonte toh hankhuh apatin Mangpa thupieh bang in ahing thou khie a, akituomna puonte phel a peisah dingin thu a peta hi.

Tuama bangin khantanhoi Johan ma in i Mangpa Jesu Khrist thawkiana thu zong ahing gen kia a ashi ni apat ani thum ni in Laisiengthou gen mabang in i Mangpa han apat in ahing thoukiata hi. Mari Magdelene zingkal khovah in hankhuh ah ava peitah chieng in hansuong kihong sa leh a sunga koima um nawnlou chi ava mutah chieng in Simeon Peter leh nuazui dangte kungah ava hilta hi. Tuachiin sil umdan enkhe dingin hanlam a zuonta uhi. Han ang tun tah chieng un i Mangpa kituomna puonte khu han sung a um amuta uhi.

Thawkiana chinite lah a nang Lazar bang a na kituomna, na hindan lui taisan zoulou a thoukia

nama?? Ahisileh i Mangpa Jesu Khrist in akituomna puonte a nuasie bang a, na nidanglai hinkhuote nuasie a Mangpa adinga thoukia na ma?? Kingaisut vai unau...

Pasian mapuina toh i gamsung uah gingtu i tamdeudeu ua, piengtha i tam mama ua, hinanleh i et vengvengleh piengtha dihtah mu ding vaang hi. I pientha dante uh dau in dawngda mama hi. Mi piengtha dihtah in hindan dih a kengtél teitei hi chi thei va ui. Tuaziehin ipienthana uh en tha chiet va ui.

Pasian a mi piengthah ka hi kichi a, Lazar bang a i Nidang lai hindan paikhiet nuomlouna toh thou khawm akitam mama mai hi. I hattuom sung leh i pawlpi sung uah, Kolossa3:5 a sawltah Paul thugen Kolossa hattuomte kungah na Nidang lai hinkhuo, na mihing luite uh pai hie un achi mabangin i Khristian hinkhuo ua i mihing lui hindante uh zah thei a hi mawngmawng sih hi. Pasian a pienthana dihtah nei i hileh i kiletsahnate, i kithupisahnate, i thutah lounate, i sum le pai ngainat tahlutnate, i nehguh tahguhnate, i mi demdemnate, i thangsiet hatnate, leh i hoilouna chintengte uh i paikhiet ding ahi. Lazar han a ni lii um a a ui (namsie) mabangin tulai gingtu

hattuom enkoltu Upa, Pastor, Mission worker, Lamkaite i seppi i lawm i guolte a dinga ki-ui siengta hi. Nang leh kei i kitheisih ua hi'n, i LCC pi ten namsie ang sa ua, i Upat pite'n dongkhol ang sa ua, i vaihawm pite'n namsie ang sa ua, i Pastor pi, i mission worker pi leh i lamkai pite'n namsie ang sa siengta unau, Lazar kituom banga i hindan luite paikhie nuomlou leh i lunggel hoiloute i paikhiet lou zieh ahi.

Biehinn sung leh pulpit tung ah vang koima hagau milou a um sih a, hinanleh pulam ah hina toh kituohlou a gamtang leh hinkhuo jahna in i mihihna dihtah a gen chieng mama zel hi.

Tuabanah i Hattuom/pawlpi sung en talei, kumpi Saul banga ei nna hoi sem leh phattuom ngai kisa mama, ahivanga belamtal leh bawngtal thau hamte i seppi i lawm i guolte'n zata chimhuoisa in ana chimtahta mama uh hi!! I innvengte bang in, i Hattuom Mipite bang in za mun simta uhi Unau.. Kumpi Saul banga panmun, sepna munhoitah Mangpa'n hing pie a, Ama deilou silte thanuom lou i nei/ i kepkep leh Saul tungah Mangpa akisia bangin ei tung ah zong i Mangpa kisia kha ding ahi. Thatlia sieng vai bangtan vei khoi sawm nalai i hiei??

Mangpa'n ama ngaisang a na hoi sem kisa a phattuom ngai kisate sang in Ama zieh a hinkhuo heng lamdang ngam a thupuana bawlte a pom zaw hi. Tulai i Hattuum te uh aki inntehsa akineisa i tam mama ua, angaina akitam mama a aneitu akitam mama ziehin achinat lawta hi. Hattuum i chi aneitu Jesu Khrist ahia, Lai-siengthou ah a enkoltu dia a se Levi chite ahi, a dangte a tosawntu ding leh Hattuum apat a va zil ding te i hi uhi. Hinanleh eilawi ngaidan pen Hattuum sung chauh a kibukhum ding thuneina teng tang ding Pastor chite apulam a koi ding (Hattuum a sungtang lou china ahi) chite haw ahi, tambang ngaidan i nei zieh ua i biehi innte uh hawm a, aneitu dingpa Jesu Khrist in ang taisan sieng ahi.

A.W. Tozer in "God come down to simple people, God is always on the side of thirsty saints" achi mabangin ki ngaingiem a Pasian gamna sep ding ahi zaw hi.

Tuaziehin i Mangpa'n a dei khu, Ama bang a i kituomna puon namsie teng nuasie dinga ang lamette i hi. Tammi Easter Sunday toh kituohin hattuum mi zousie te'n i Mangpa Jesu Khrist bang a i kituomna puonte uh- kiletsahna puonsilte, kithupisahna puonsilte, bawl thei i kisahna puonsilte leh adangdangte hankhuh ah nuosie a thoukia dingin kisa tha va ui. Dihtatna leh hoina bukim toh, kingaingingiemna, nunnemna, iitnaa, thuohzouna leh silhoi bukim teng toh thou dingin gingtute kisa tha va ui. I pienthana dihtah khu i hindan a hing lang khe zel ding ahi zaw hi.

Rome 6:8 in 'eite Khrist toh shikhawm i hi tah ua hileh, Ama toh zong i hin khawm ding uh ahi' achi ma bangin tu Easter Sunday toh i mihing luite vui mang a Khrist in a hing na lam-et bang a hinna tha toh thoukhawm dingin simtu zousie Mangpa'n hing guolzawl ta hen.

SAWMAKHAT SUN DAN TOH KISAI A NGETNA

Pasian mapuina toh sum-le-pai saina Computer kizang ahitah ziehin Sawmakhat sungten Mimal List leh a ga wmkhawm kituohsah ding leh min gel dan hing kibangsah ding in i kingen ua, tualeh Computer a khumlut chieng in min kibang lut theilou ahiziehin form khat sungah mimal min kibang nivei hing tuongsahlou ding in i kingen uhi.

JESU KHRIST SHINA ZOU A THAWKIANA THU LEH GINGTUTE HINKHUO

(Easter Sunday Message)

Rev. Dr. Hangpi Manlun

1. Thupatna. Pasion mapuina toh Good Friday i man zou nua un, tuin Easter Sunday mangthei ding a i um tah zieh un lungdam thu i gen uhi. Rev. Vanlalngaka in sapgam ah “Good Friday” sang in “Easter Sunday” khu miten athupi ngai/manjaw uh” a chi hi. Ahingei mai a Jesu thawkiana thu khu ei Khrsitiante thugin leh kingahna suongpi poimawtah khat ahi. I Bible uah jong 104-veitah atuong/kigel hi. Banah Khristian sahkhuo khu sahkhuo dang sang athupina leh tungnun jawhna jieh ahileh amukhepa Mangpa Jesu khu adamlai a genma bang in ashinajou a, nithumnin han a kipat athawkia jiehin ahi. Khawvel ah sahkhuoamtah aum a, amukhietute tuni dong in i Mangpa Jesu bang a athoukia koima aumnai sih hi a zong aum ngaingai sih ding hi. Tuaziehin i sahkhuo uh khu sahkhuo dih-le-tungnung ahina suhlatna khu Jesu thawkia jiehin ahi.

Jesu thokia masang Hapta kalmasapen Sabath khu Kiginni ni-tah dah 6:00pm in abei hi. Tuanizouin Pasianni (Sunday) akipan a, tuachin zingsang matahin May Magdalene, Salome leh Mary dangte hanah Jesu luong gim namtui nu ding in avapeita uhi. Tuachin Jesu thawkianthu avamuta uh chi Bible ah imu uhi. Ahin Jesu thawkiana thu tuni dongin a pomlou leh gingta lou khawvel ah mitam tah aum uhi. Dr. Alban Doughlas gen dan amaute pomdan tambang ahi uhi:

2. I). Jesu thawkiana thu pen kisawlina/kikhemna na mai ahi chipawlte pomdan in. (Hook Theory). Tamkhu

kisolna mai ahi a, thutah ahisih a; tup khat nei a phuohawm ahi achi uhi. Jesu shithu khu History leh Pasion thu in jong apom sih a, nuajuiten aphuohtom uh ahi achimai uhi.

ii). Jesu Khross ah ashidang maimai angawna. (Swoon Theory). Sepaiten Jesu khu thatlum louin, shidang mai ahijaw hi. Tualeh, hanvot leh silgim tui apiehte un asuhal kia hi. Tuachin ahing hing kia hi achi moh uhi. Alelam ah ngaituata lei asil don sahte uh khu koi hinna ding sangin poison lam ngentang ahi jawsop hi. Tuata jiehin shi ahijaw maithai hi.

iii). Mitvaina leh mukhielna mai ahi. (Hallucination).

Nuajuite khun Jesu mukia akithalop mama ua, tuachin athou kia ngei ding in jong agingta uhi. Tuachin a mitha un amu maimai uh achi uhi. Eiten mitha a mi imu dan in Jesu thawkia thu amu dan agen uhi.

iv). Hagau lam sil maimai ahi. (Ghost Theory). A hagau amu ua Jesu hidingin agingta mai uhi achi uhi. Ahin Hagau in tahsa-le-sih a jong ne in jong a don thei sih hi. (Luk 24:39-43).

v). Masanglai thawnthu/tangthu maimai ahi. (Myth Theory). Tang thu phuhtom kigen sonson maimai jel ahi a, atahtah ahisih hi. Tuajiehin, masanglai miten ana gen uh tua kigen sonson maimai ahilel hi achi uhi.

vi). Genchiena dihtah. I Mangpa Jesu khu adamlai a, agen bangin Han akipatin kaithaw in aumta hi. Tualeh Nasepte 2:24-in “ Pasiain shina hennate khu aphelsah a, akaithouta, amakhu shina in hentang guol ahitahlou jiehin” achi.

Tuachin, kalmasapen ani masapen in vaah khu khawvel miel tanvah ding a thu apiehbang in, tuami ni ma in khawvel vaah Jesu khu, Eden bawsietna jieh a hanmiel nuai atoute angsahvalta

hi. Tamkhu Jesu thawkiana ni ahijiehin ei Khristianten (Sunday) khu Pasiain biehina ni ding in I jangta uhi.

3. Thawkiana thahatdan.

Dr. Albion Doughlas in, “Jesu thawkiana khu khawvel a silbawltheina thupipen ahi achi hi. Tualeh, Atom bomb hatnate, Hydrogen hatnate, leh Uranium hatna chite khun suhsiet theina thahatna anei giep uhi. Thawkiana thahatna in mishite kung a hinna piehtheina aneijiehin a power ahat jaw hi” achi hi. Banah khawvel ah thahatna (power) tuomtuom imuthei ua, etsahna din, electricity thahatnate, vang-ging thahatnate, huipi guopi thahatnate, thamlouin Setan nasan thahatnate in jong thahatna power anei chiet uhi. Ahin, Jesu thawkiana khu tam teng zousie tung athunei leh sang a thahat jaw ahi hi.

Thamlouin, natna thahatna jiehin khawvel a lamkai liente leh sahkhuo mukhietu zousie ashi siengta uhi. Tuachin, ahante uh jong thupitah a bawlin aum chiet uhi. Ahin, tuni chiengin khatma jong athoukia sih ua, ahante uh jong akihong sih uhi. Ahin Jesu khu tunin athoukiata hi.

Nidanglaiin, Aiguptaten khawvel top chieng in thawkiana um ding in ana gignta uhi. Tuachin

Pyramid-khu ahan inn ding un mi 1,20,00-velten asun ajan in kum 35tah alam/sem uh a, tuachin pyramid masapen khu analam zout ahi. Tuami lamna ding a suong jahte uh khat maimai jong agihdan ahileh ton khat sang a gih jaw ahi hi. Tuachin alamjoutah un, akumpipa uh sisa luongkhu hoitah a tuomin (embalmed) bawlin akoi uhi.

Tualeh Pyramid khat atawkhahna uah ahansung ah ann (wheat) amukhie uhi. Akoina jiehuh ahileh ahagau athaw chiengin, agil akial ding a, tua ann apoimaw ding chiin akoisah uhi. Tua ann khu kum 3000-val kikoite zong amu ua, anehtheina laiphiel hi achi uhi. Ahin akoisahte uh khatbeh alengpa uh lamkai in athwkianai sih uhi. Thamlouin Taj Mahar khu Shahajan in azi ttah han/kivuina dia abawlsah ahi. Ahin ahankhu apoimaw pen sih a, athawkiana thu apawimaw hi.

4. Jesu hanvengtuten zua agen uhi. (Mathiu 28:11-15)

4.i). Rome sepaite khu Jesu luong aveng uhi. Ahin Jesu han akipat anghawtahin zilling thupitah hing um in, avengtute khu khawtheilouin aum sieng uhi. Ahin khuo ang theitah un dan siemte kung sil umdan avahilta uhi.

4.2.). Tualeh Juda Siemputen Jesu athoukia sih chia zuau

gen dingin sumte pie in mite agolgu uhi. Tamkhu Thuhuntha ading a golguhna huaisiatah (corruption) ahi. Sepaite ihmut kalin Anuazuiten ala/gu doh uh chin zuau agensah uhi. A ihmu uh ahileh bangchi dan a aihmut kal ua siltung khu athei ding uh e zuausanpi ahi. A jieh ahileh silkhat veng ding a sepai kikoi a a ihmud uh khu khawvel asil hithei ahisih hi. Tualeh ahunlaiin sil vengtu ding a kikoi khat in asilvente uh angaisah sih uh leh shitan a jong gotna pieh ding ahi uhi. (Nasepte 12:19). Election MP/MLA chieng a vote kuong kiventge khu avengte ihmu in kigumang leh India gam pumpi anahbuai ding dan toh kibang hi. Siempu liente khun Pilat gotna ding apat asuatatna ding in theitop in pan alahpi jiehua suata ahi uhi. Tamte tahsang in tuni dong in Setan in mitamtah lungsim leh ginnate suhmiel sahin Jesu thawkiana tahsanglou ding in akoita hi.

5. Zuauthu ahidan tomkim in isuiding uhi. 5.i).

Avengtu zousie asilven uh a ihmud san uh leh jong abon un aihmu ngel ding uai le, amauh ading in sil hitheilou ahi. 5.2). Suongte akilia va pual laiin khat beh in thawmza in athou sih ding uh e, ashi ahisih uh leh? 5.3). Nuazuiten, tua suongpi abon un alia lou leh mi

khat leh ni lia guol ahina diai le? 5.4). Avadap lut thei ngel ding uaile tuabang sepaiten khautah aven lai un? 5.5) Avengtute a ihmu uh ahileh bang chidan agutute athei uh e?

5.6). Jesu thawkina mutahtah mi asingtelte gendan leh amaute gendan akikal uhi. 5.7). Tualeh, athugen uh adih ahileh bangchi dan a sepaite thamna (guhgolna) pieh ngai uh e?

5.8). Tualeh, anuajuiten vagu hileh uh bang dia apuonsilte anuasiat ding uh la?. Tamte, akipatin zuauthu leh Jesu thawkiana thudih ahidan akimu chieng thei hi.

Tualeh, Judate leh Gentailte alah a zuau thu thang dihloou umkhu tuni dongin akithang den hi. Dr. Wilbur Smith, genchet dan in: Numeite khu han dihloou ah vapei kha uh chin agen uhi. Ahin Ziltop (Friday) apat Pasianni (Sunday) zing sang kikalin i it-le-ngainatna han imanghil talawm ding uh e? Tualeh, Joseph mihausapa han a huon sung aum ahi a, tuanah handang a um sih hi. Ahin numeite khu mittui luong apeilai un alampiel kha uh achi kia uhi. Ahin, pasalte Simon Peter leh Johante jong hanah kaplouin avapei ua, han-guoh avamuta uhi. Thamlouin Han-gei a Angel umin “Ama tamnah aum nawn

sih a, athouta hi. Hingpei unlen, Mangpa kisielna hing en un” achi hi. Angel in zuau agen sam ding e le? Tuaziehin, Jesu thawkiana ginlelnate zousie khu zuau thu phuohtawm ngentang ahi hi.

6.Jesu athawkianua-in tamte kung ah avakilah hi.

6.1) Mary Magdalene kung ah avakilah hi. (Mark 10:9-11) 6.2) Numei dangte kung ah (Mathiu 28:8-10). 6.3) Peter kung ah (Luke 24:34) 6.4) Nuazuite kung ah Thomas umlou kalin. (Johan 20:19-25) 6.5) Nuajuite kung ah Emmau lampi ah (Luke 24:13-32)

6.6) Nuajuite kung ah Thomas umpet in (Johan 20:26-31). 6.7) Nuajui sagite kung ah Galilee tuipi piau uh (Johan 21). 6.8) Nuajui 500-te kung ah (I Kor.15:7). 6.9) James kung ah (I Kor. 15:2) 6.10. Nuazuite kung ah Olive tang ah (Nasepte 1:3-12).

Tamte jiehin, Jesu thawkiana thu khu thutah leh ei gingtute ading a iginna uh kingahna uh ahijiehin, hangsantahin ipuong jah jeljel ding uhi. Tualeh, Easter Sunday massage thupipen ahi leh Angel gen bang in, “Hingpei unlen hing en un ... va genta un” (Come and see... go and tell) ahi. Jesu athawkiata chi’n ajanailou mite kung ah igen gen jeljel ding uhi. Amen.

ZPWF COLUMN

February 26, 2020 to March 20, 2020 tan a Tunnu Limbel panpina pete:

1. Nu Chingngaikim, Zomi Colony	Rs.	1,200
2. Upa Ginsuankhai, Tuining	Rs.	200
3. Upa T. Mangnou, Tuining	Rs.	100
4. Pi Chingboi, Tuining	Rs.	100
5. Pauliankhup, Tuining	Rs.	50
6. Upa P.K Soi a , Tuining	Rs.	100
7. Pi Niangpi w/o Hausuanthang MDC Zomi Colony (Jan. & Feb.)	Rs.	3,000
8. Rajen, Mangjing	Rs.	100
9. Lamnu, Mangjing	Rs.	100
10. Pa Khaiminlian, Lailam Veng	Rs.	5,000
11. Nu Chingneu, Lailam Veng	Rs.	2,000
12. PWF Behiangtung, Anntang taang	Rs.	700
13. PWF Tangpijol Anntang Kg. 50 &	Rs.	200
14. Rev. Zamlianpau, Central Church (Dec/Jan/Feb.)	Rs.	3,000
15. Upa Jamsienmung, Zomi Colony	Rs.	3,000
16. Upa Goumang, Central Church	Rs.	1,000
17. Nu Chinmuankim, Central Church	Rs.	500
18. Pa H. Kapneithang, Central Church	Rs.	3,000
19. Upa Ginkhanmang, Hiangtamjang	Rs.	500
20. Mangkhanthang, Imphal	Rs.	3,000
21. PWF Muallum, Anntang Kg. 70 &	Rs.	120
22. Upa Pumsei, Tuilaphai	Rs.	250
23. Pa Lunthang, Lunjang	Sakhimal khat	
24. ZPWF Khawmpi Tuohkhawm (Tunnu Limbel)	Rs.	8,737
25. ZPWF Khawmpi Pledge card	Rs.	50,780

Petu zousie Mangpa'n ale tampi in hing gualzawl taken!

KHOCHIN SUMPI (SAWMAKHAT) SUN DAN

November 2019 to 20th March 2020

1	Aina	65,610
2	Awnchinkap Khuo	25,666
3	Bangaluru	2,34,065
4	Behiangjang	1,10,023
5	Behiangtung	2,000
6	Belpuon	5,500
7	Buhsau	23,579
8	Central Church	12,43,531
9	Chennai	1,04,800
10	Delhi	5,51,624
11	D Phailian	2,02,460
12	Gangpimuol	66,689
13	Hiangdung	3,194
14	Hiangmuol	6,030
15	Hiangtam B	34,320
16	Hiangtamjang	16,865
17	Hiangtam K	18,190
18	Immanuel Khopi	25,710
19	Imphal	3,33,199
20	Kanan Veng	2,34,035
21	Khuoinuoi	10,310
22	Lailam Veng	20,30,627
23	LDCC Hiangzou	94,235
24	Lunjang	17,270
25	Manniang Khuo	66,040
26	Maukot	8,854
27	M Buongmun	87,360
28	M Khawimuol	7,810
29	M Muoltam	45,450
30	Munpi	680
31	Muollum	2,42,421
32	Muvanlai	4,022

33	N Khaukuol	40,795
34	P Hatching Sion	9,970
35	PN Khovong	31,940
36	P Salem	15,000
37	P Suohzahau	7,500
38	Saiboh	56,490
39	Shillong	3,37,787
40	Singngat	2,38,549
41	Sugnu	1,95,210
42	S Vengnuom	81,280
43	Talnuom	1,650
44	Tangpijol	64,933
45	T Daijang	58,443
46	Teisaijang	38,240
47	Thingkangphai	1,48,010
48	T Khajang	25,200
49	T Munnuom	85,070
50	Tongdam	3,36,344
51	Tuibuong	12,12,218
52	Tuimanjang	5,300
53	Tuining	2,68,620
54	T Zion	7,800
55	V Bethel	32,855
56	Zomi Bethel	66,191
57	Zomi Colony	7,57,452
58	Zomi Zion	57,670
59	Zoumunnuom	40,770
60	Zoumun	11,100
Total		1,01,54,556
Budget zat		2,90,00,000
Mu ding kivat nai		1,88,45,444

COVID-19 LEH SOCIAL DISTANCING

TULAI BUOINA ANTI-CHRIST AHIEI ANTI-COVID-19?

-Khai Minthang Samte

THUPATNA

Leitung mihingte kipilsahna leh kibawlthei sahnate Pasion masang ah bangma ahilou dan tami COVIT-19 in tahlang isa uhi. “Gamte, silbawl theinate leh thupinate kumtawn in nang a ahizieh in, Amen” (For Thine is the kingdom, and the power, and the glory, for ever. Amen) chi khu kigenkhiel hetlou hi. Natsie leh puul natna chite ideipen hisih lezong ahun-hun in ang tung veve hi. Tambang natsie/ puul natna pen Lai Siengthou sung ah zong kimu a, leitung tangthu ah zong kimu hi. Ipu-ipate ngaina apat i-et chieng un eite lah ah zong ana um tham chi pen haiguollou ahi hi. Tambang natna tu-le-tu a ibuoipi uh ahizieh in Lai Siengthou leh Zo ngaina tawh themkhat kikum vai in, kikepdan tu a i kikep sawmdan tawh a kituohnai chi sui va ui.

CORONAVIRUS TANGTHU TOMKIM

Coronavirus natna neite in khosih, khu leh nahhu tom (fever, cough and shortness of breath) nei ua, ahamsa diehte nah theilou, awmna saden, lung-am leh nephu leh maitang dup chite ahi hi [Centers for Disease Control and Prevention: Coronavirus Disease 2019 (COVID-19), 2020]. Tambang natna kipatna Guangdong, China ah 2003 in ana kipanta hi. Tuami natna khu severe acute respiratory syndrome coronavirus (SARS-CoV) na kichi in, leitung gam 29 ah na kizel in, mihing 8,422 in natna nawei in, mihing 916 na shilaw uhi. Tuajou in 2009 in pH1N1 influenza kichi Mexico apat kipan in leitung gam 214 ah na kizel in, mihing 500,000 taang in na shilaw uhi. 2012 kum in Middle East respiratory syndrome coronavirus (MERS-CoV) kichi khat Saudi Arabia apat in ana kipan kiam a, leitung gam 27 ah kizel in mihing 2,494 in natna nawei in, mihing 858 na

shilaw kia hi (Park, Thwaites, & Openshaw, 2020). Tutung a natna pen COVID-19 kichi a, tuni March 21, 2020 tan in leitung gam 185 a kizel in, mihing 267,013 in natna vei in, mihing 11,201 shilawta hi (World Health Organization: Coronavirus disease (COVID-19) Pandemic, 2020).

LAI SIENGTHOU LEH SOCIAL DISTENCING

Lai Siengthou i-et chieng un natna kilawsawn thei leh social distancing ana bawl zing uh khu phah-natna (Leprosy) ahi hi. Pasian in Moses kung ah tambang natna bangchi kep diing chi hoitah in ana gen hi. Leviticus 13na isim chieng in tambang natna umzie leh kep diingdan kichientah in ana gen hi. A natna neite mitawh a kilawsawn louna diing in atuom a a um diing (Self-quarantine/isolation) leh mipite umna camp ahiei khopi pulang a koi diing (social distancing) chi ana genkha hi (Stangl, Earnshaw, Logie, et al., 2019). Tuabang natna neite akep-akhoi didan hoitah in kigiel dimdem hi. Siempudan 13:46 sung ah, “Khum natna (phah natna) anei sung teng in ama khu sienglou ahia, tuachi in midante lah apat kikhiinmang in pembuh pulam a ateng diing hi” chi hi. Tuama bang in abawl tahpi uhi chi Leengte Nina 7:3-20 i-et chieng in kimuthei hi.

ZO TAWNDAN LEH SOCIAL DISTANCING

Zo tawndan (ngaina) mama ah zong puul natna ahiei natna hiipi gilou a um chieng in Siemputen tuitaw-tuilu ahiei gam nathoi in, tuami natna neite innsung ah kulkhum in a innmai uah sawlbawh khai in, “zie-tang” uhi. Tami sawlbawh innmai a kikhai in innsung ah mite natna hoilou nei ahi ua a ensah a, sungtum-pusuoh kikkham hi. Tam pen natna hii apat kilawsawn venna diing a kituomkoi leh zapi tawh kisukha lou diing a bawl na ahi hi (isolation and social distancing). Tuami natna nei nu/pa/innkuonte Siempupa in enkai in, adamsieng masangteng uh pusuoh sahlou uhi. Tuathamlou in, natna zauhuoi hiileng a um chieng in khomuol ah sawl kikhai in zin-le-leeng koima pusuoh-sungtum omlou hi. Tam pen tulaitah a self-quarantine, self-isolation, social distancing ichite ahi hi. Siempute in khohun leh natna omdan en in, natna a zauhuoi nawnlou chieng in siensuo in khopite leh khovengte tawh kikawmtuona umthei kia pan hi. Tuabang a ana bawl zieh un puul natna zieh in na shigam samlou uhi.

HOULIMNA

Lai Siengthou sung ah puul natna ahiei phah natna pen Israel-te Pasian masang a atawnkhiel chieng ua Pasian gawtna (sapsietna) in ngaisut ua, Pasian masang a kisiakia a Ama maipha suikia diing a hatna (wake up call) in ngaisut uhi. Tami pen Hagau lam ah koi talei, tahsa natna ahizieh in bangchi kiven diing chi pen ngaisutlou phamaw hi. Phah natna bang a mitmu thei diing a kilang lou ahizieh in koiteng in COVID-19 natna paai chi pen kigen theilou hi. A natna kilahna khu ni 14 sang a tamzaw zong hithei nalai ahizieh in koiteng tuami natna paai a zapi lah a um chi kitheilou ahizieh in eima ihiei, igei a um nu/pa/te zong hithei gige china himawh hi.

Anatna khu anatna vei mite apat a kilawsawn (communicable or contagious) ahizeih in a kilawsawwna tawpsah theidan um leh chi in kumpi vaihawmte leh chidamna lam a semten gen uhi. A kilawsawn hatdan khu patauhoi mama hi. Etsahna diing in, Georgia state, USA ah official tah in March 2, 2020 COVIT-19 natna nei mihing 2 um a, ni sawm (10 days) jou in COVIT-19 natna nei mihing 33 um a, ni 19 jou (March 21, 2020 – tami lai ka gel tan) in COVIT-19 natna nei mihing 555 umta hi (Smith, Yourish, Almukhtar, Collins, Harmon, McCann, & Wu, 2020, March 21). Akhan hatdan i-et chieng in patauhoi mama hi.

1. KUMPITE THU MANG DIING:

Kumpiten mipi kikhopna bawllou tadi phot diing in thuphuon bawl uhi. Kumpi ichi chieng in eima Hattuum a member-te zong china hithei hi. Tampen koima biehn khahsahna hilou in mipi kikhopna apat in tami natna khanghat mama chi mukhiet ahizieh a, tami natna kiem theina diing in panlah ahi hi. Tami in Hattuumte maimai tuomkawhna a kibawl hilou a, mizapi kikhopna khat phot ahuom ahi hi. Tami article gel ahitan in mi 10 sang a tamzaw umkhawm theilou diing chi kumpiten thuphuon bawlta ua, bawllou diing honkhat zong kigenta hi (Lemire & Colvin, 2020). Tambang hun chieng a Christian-te a diing a ibawl theipen uh kumpite chidan zuilou a mizapi kikhopna a pei teitei a COVIT-19 natna khangsahtu leh kumpi neisah tawpsah hilou zaw a kumpite beidotna panpitu hi diing kisamzaw hi. Lai Siengthou in kumpi vaihawmte thumang diing in ang hiltaw hi (1 Peter 2:11-17).

2. SOCIAL DISTANCING LEH LAI SIENGTHOU:

Lai Siengthou sung i-et chieng in Social distancing kichi pen puul natna neite tung ah na kibawl a, ih Zo ngaina ah zong na kibawl hi. Thutha hi hetlou in, ibawl khah ngai nawnlou ahizieh a thutha bang ahi hi. Pasian in zong Moses tungtawn in Egypt-te tung a gawtna apieh diing chieng in social distancing na bawl a, self-quarantine or isolation na peipi in kimuthei hi (Exodus 7:14-12:36). Tualou ah phah natna neite zong khopi pulang ah (Social distancing) na kikoi hi (Lev. 13:1ff. Cf. 2 Kings 7:3-20).

3. ANTI-CHRIST HILOU, ANTI-COVIT-19 HIZAW:

Kumpi vaihawmte vaihawmna khu Christ-doudaltu hilou in COVIT-19 doudalna diing a panlahna ahi hi. Tamteng zosie deina pen Christian-te bawlsietna (Anti-Christ/ian) hilou in, a Christian hi in, a Christian loute hitaleh COVIT-19 natna tua aveisate ban ah koiman vei sih leh china tawh kibawl ahi hi. Tuazieh in Anti-Christ/ian hilou in Anti-COVIT-19 ahizaw hi. Thamlou in nasep poimaw (essential jobs) a semte lousie mipite innsung a kikulkhum phot diing in kumpi in thuphuon bawlta hi. Tami hun sung a nasep kuon theiloute, nasep khawlsah, sumbuh kikkahte leh buoina Dangdang tuohte a diing in kumpi in zangna-dopna (Compensation or stimulus checks) in mimal huna kibawl diing chi khensatna lata uhi (Toone, 2020). Kumpi thumanglouten kumpi panpina zong lahda uleh hoi phiel diing hi. Anti-Christ/ian hileh zangna-dopna (stimulus checks) Christian-te kipelou diing hi.

4. TAANG DIING I, MIT DIING?

Tambang hun chieng a nang leh kei natna zieh in kumpi sum tampi beilaw a, doctor leh nurse tampi gimlaw a, ih innkuon leh Hattuumte lungkham law a, aphantmaw leh shina in ih innsung ah vaihawm nalai diing ngaisut huoi mama hi. Thumanglou a paupeng sang in tam atung a ih genteng ban ah tampi um nalaite noptuom tuntu hi diing kisamzaw hi. Mite a diing a paupeng hilou a thupha ihi diing kisamzaw hi (Gen. 12:2). Tami hun pen Anti-Christ/ian hilou zaw in Christian-te pichindan etsahhun ahizaw hi. I Cross-te uh biehinnsung maimai ah laampi lou in khopam lam zuon vai. Mipite chimaw genthei laitah in doctor, nurse, kumpi vaihawmte thapetu a pan hun, gilkielte leh inn-le-lou neiloute ann pieh hun ahi hi. Nasep poimaw semte (essential job) thungetna a panpitu hivai.

5. BEIHINN HILOU, BIEHDAN DIHTAH (TRUE WORSHIPPERS):

Jesu Krist leh Samari numeinu kihouna ah Jesu Krist in Pasian biehdan dihtah agen hi. Jesu'n, "Hinanleh ahun tung diing ahita, tun zong atung ahita a, tuahun chieng in abe tahtahte'n Pa khu Hagau leh thutah in abe diing uh, aziehpén Pa in Pa in tuabang mi Ama be diing in asui hi" achi hi (John 4:23). Pasian beihna ah Pasian lungdamna khu biehinna sung a va um zieh hilou in Hagau leh thutah a biehnna khu ahizaw hi. Pasian mun zousie a um ahileh eima pindan sung ah zong Hagau thute kigen in, Hagau laate kisa thei a, Pasian phatna leh biehnna (praise and worship) kibawl thei thamtham hi. Biehinna sung pen ministry bawlina phuolpi hilou in gingtute hatkhawmna, guolzawlina leh hahkhietna (Gather, bless and send out) mun ahizaw hi.

THUZAWNA

Tambang natna hiipi khu leitung pienchil apat a ana umzel ahia, Lai Siengthou ban ah Zo ngaina ah zong kimu hi. A lamdang seng hilou in, Pasian theipina tawh ana tung zel, tulaitah a tung, leh ang tung zel diing ahizaw hi. Kumpi vaihawmte thugen khu Anti-Christ/ian hilou in Anti-COVIT-19 ahizieh in a chi dandan uh zui diing ahi hi. Biehinna kai theilou diing chi hilou zaw in mizapi kikhawm theilou diing, mi 10 sang a tamzaw munkhat phot ah umkhawm theilou diing chi hizaw hi. Tualemah in, tami hun sung in Pasian kung a nasetah a kikou a, tami puul hiipi ang lahkhet sahna diing a nget ban ah, tami tawh kisai a hospital leh aphamaw nasepna (essential jobs) semte a diing a thu ngetsah diing ahizaw hi.

LAIBU ETTE

Centers for Disease Control and Prevention. (2020, March 21). Coronavirus Disease 2019 (COVID-19). Retrieved from <https://www.cdc.gov/.../2019-n.../symptoms-testing/symptoms.html>

Grzybowski, A., & Nita, M. (2016). Leprosy in the Bible. *Clinics in Dermatology*, Volume 34, Issue 1, January–February 2016, Pages 3-7. doi: <https://doi.org/10.1016/j.clindermatol.2015.10.003>

Grzybowski, A., & Virmond, M. (2016). Leprosy: Between biblical descriptions to advances in immunology and diagnostic techniques. *Clinics in Dermatology*, Volume 34, Issue 1, January–February 2016, Pages 1-2. doi: <https://doi.org/10.1016/j.clindermatol.2015.10.008>

Lemire, J. & Colvin, J. (2020, March 19). Trump signs coronavirus aid package, invokes Defense Production Act to fight COVID-19. Retrieved from <https://abc30.com/.../trump-signs-coronavirus-aid-pa.../6024211/>

Park, M., Thwaites, R.S. and Openshaw, P.J.M. (2020), COVID-19: Lessons from SARS and MERS. *Eur. J. Immunol.*, 50: 308-311. doi:10.1002/eji.202070035

Smith, M., Yourish, K., Almukhtar, S., Collins, K., Harmon, A., McCann, A., and Wu, J. (2020, March 21). Coronavirus in the U.S.: Latest Map and Case Count. *The New York Times*. Retrieved from <https://www.nytimes.com/.../2020/us/coronavirus-us-cases.html...>

Stangl, A.L., Earnshaw, V.A., Logie, C.H. et al. (2019). The Health Stigma and Discrimination Framework: a global, crosscutting framework to inform research, intervention development, and policy on health-related stigmas. *BMC Med* 17, 31. <https://doi.org/10.1186/s12916-019-1271-3>

Toone, S. (2020, March 21). Trump says stimulus checks will be ‘much more’ than \$1,000. Retrieved from <https://www.ajc.com/.../breaking-trum.../ye9TlqiowJXyQbyTiuP5IO/>

World Health Organization: Coronavirus disease (COVID-19) Pandemic. (2020, March 21). Retrieved from <https://www.who.int/emergen.../diseases/novel-coronavirus-2019>

~~~~~

## PATRON MEMBER-TE

|                           |                              |                            |                                |
|---------------------------|------------------------------|----------------------------|--------------------------------|
| 1. Upa Gouzamang          | 2. Pu Hav. Khamchinkhup      | 3. Pu Khamzalam            | 4. Pu Chinzasuan               |
| 5. (L) Upa Liansuanpau    | 6. Pu Khamchinthang          | 7. Pu S.Dalthang           | 8. Upa Kapkhanthang            |
| 9. Upa Langginmang        | 10. Upa S. Nangkhanlal       | 11. Pu S. Lamkhotang       | 12. Upa Dr. M. Lachinkhai      |
| 13. Upa Khamchinjam       | 14. (L) Upa D.K.Manlun       | 15. Upa Suankhanmang       | 16. (L) Upa Khupgou            |
| 17. Upa Chinkham          | 18. Upa Ngulchinkham         | 19. (L) Rev. V. Vungzalian | 20. Rev. Retd. Kamkhosoi       |
| 21. Rev. Retd. Tualzachin | 22. Rev. (Rtd.) H. Nengzatun | 23. Rev. Awnkhankhup       | 24. Rev. Dr. Hangpi Manlun Zou |
| 25. (L) Pu Tuanzapau      | 26. (L) Rev. Ginchinjam      | 27. (L) Rev. Khamzasuan    | 28. Upa T. Lamkhotawng         |
| 29. Upa Khaichinmang      | 30. Rev. Stephen Chinzathang | 31. Pu Khupkhanmang        | 32. Pu Khaidohlian             |
| 33. (L) Hav. Khamzahang   | 34. Pi Vungzanuam            | 35. Pu T. Gouzadou         | 36. Upa Liensuonkap            |
| 37. Pi Zelkhoichin        | 38. Pi Hatkhanvung           | 39. (L) Pi Ngaihoiching    | 40. Pi Mankhannieng            |
| 41. Pu Goukhanmang        | 42. Pi Chingzalam            | 43. Pu S. Thianzakhai      | 44. Pi Kamkhanching            |
| 45. Pu Haukhanpau         | 46. Pu Tuallianmang          | 47. (L) Pu Dongkap         | 48. (L) Pi Chingkhanmang       |
| 49. Pi Donkhonian         | 50. Upa Henzakhup            | 51. (L) Pu Saichinpau      | 52. Pu Goumang                 |
| 53. (L) Upa Khamkhanhang  | 54. Shie Laangkhanlal        | 55. Pu Khamkhanlun         | 56. Upa L. Tualkhanpau         |
| 57. Upa Jamsianmung       | 58. Upa Ginzadong            | 59. Pu Kaizathang          | 60. Pi Goizanuom               |
| 61. Pi Thangneivah        | 62. Pu Khamzathang           | 63. Pi Donchin             | 64. Upa Liankhanmang           |
| 65. Pu Hauchinlun         | 66. Pu T. S. Lal             | 67. Pi Goichin             | 68. Pu T. Khupchinthang        |
| 69. Upa T. Kaizalam       | 70. Pu Paul Henkholal        | 71. (L) Pu Soikham         | 72. Rev. P.C. Manga            |
| 73. Rev. Khamchinkhai     | 74. Rev. Jamlianpau          | 75. Rev. Chinzapau         | 76. Rev. Retd. Kamkhozam       |
| 77. Upa (L) Chinpu        | 78. Pu Zamkhanthang          | 79. Pu Chinglen            | 80. Miss Chinhaunieng          |
| 81. Upa P. K. Soia        | 82. Pu Goukhai               | 83. Pi Niangkhanmang       | 84. Evan. Retd. G.L. Joshya    |
| 85. Pi S. Chingkhanmang   | 86. (L) Pu Vumchinkhup       | 87. Upa Khaihenthang       | 88. Upa T. C. Pau              |
| 89. Upa Nengchinkap       | 90. (L) Upa Jamkhongam       | 91. Upa HT Manga           | 92. Mrs. Vahkhohling           |
| 93. Pu Hauliankap         | 94. Pi Chinnu                | 95. (L) Upa Ngulzakhai     | 96. (L) Upa T. Gougin          |
| 97. Pu Ginsuanhau         | 98. Upa (L) Langminthang     | 99. (L) Rev. David K.Samte | 100. Upa T.S.K. Samte          |
| 101. Upa S.K. Khama       | 102. Pu Jamkhopao            | 103. Pu Thathang Taithul   | 104. Pu Kamkhanpau             |
| 105. Bhim Prasad Ghatani  | 106. Rev. M. Kapsuanthang    | 107. Nu Chingneikim        | 108. Rev. Khupkhansuan         |
| 109. Pi Mannuamching      | 110. Rev. Kaimuanlal         | 111. Upa Nengkhanlian      | 112. Nh. Deborah Zou           |
| 113. Pu T. Kuppa          | 114. Rev. (L) Mangsuanthang  | 115. (L) Pu Lamchinhau     | 116. Upa Pauchinlel            |
| 117. Nu Kimneihoi         | 118. Upa Kamgenpau           | 119. Nh. Niangsuanuam      | 120. Nu Ngaikhanvung           |
| 121. Pu P. Sanjiv Zou     | 122. Upa M. Kaichinkham      | 123. Upa T. Sianchinpau    | 124. Upa Sianzahau             |
| 125. Pu L. Thenkhosoi     | 126. Pu Kamsuanhang          | 127. Upa Th. Kaikholam     | 128. Upa Lunchinthang          |
| 129. Pu P. Tongthang Zou  | 130. H. Nehzamang            | 131. Pu Thangsuankhup      | 132. Upa M. Kamzadou           |
| 133. Pu Jamkholian Munlao | 134. Pu Sianzakhai           | 135. Upa Thangginsuan      | 136. Pu Kapminlun              |

## LIFE MEMBER-TE

|                            |                          |                       |
|----------------------------|--------------------------|-----------------------|
| 01. Upa (L) T. Khupkhenpau | 02. (L) Pu M. Ginzahau   | 03. (L) Pu Selzapau   |
| 04. Pu L.C. Pautungnung    | 05. (L) Pi Khamkhannieng | 06. Pi Ngaiuom        |
| 07. Upa Chinsuanthang      | 08. Upa Shanti Kumar     | 09. Pu Kamkhohau      |
| 10. (L) Pu Khamkhohau      | 11. Upa Khamzathang      | 12. Upa Chinkhanthang |
| 13. Pu (L) Tongzathang     | 14. Pi Chiinneilam       | 15. Upa Kulthang      |
| 16. H/Sm. Upa Kaichinpau   | 17. Pi Niangzalam        | 18. Upa P. Doukholun  |
| 19. Pu Kapminlian          |                          |                       |

# *Fundamental*

Please return to:

## *The Editor*

KHRIŒTIAN TANGKOU  
ZPCS Office, Zomi Colony  
Churachandpur - 795 128  
P.O. Box - 48, Manipur, India  
Synod Office Telephone No. (03874) 235105  
Website: zousynod.org | email:info@zousynod.org  
zpcs@rediffmail.com/zousynod05@gmail.com

7a,

---

---

---